

COMUNICÂT STAMPE

La Agenzie e je in vore sul INTERREG IV Italie-Austrie ID-COOP

LENGHIS MINORITARIIS E DISVILUP ECONOMIC: LA SFIDE DE ARLEF

**135 Comuns de provincie di Udin
clamâts a rispuindi a un cuistionari dentri dai 22 di Jugn**

Udin, ai 20 di Jugn 2013 - L'ARLeF - Agenzie regionâl pe lenghe furlane e je daûr a lavorâ dutun cun la Academie Europeane di Bolzan (EURAC) suntun progjet INTERREG IV Italie-Austrie che al à tant che obietîf chel di promovi la nassite o la incesite di cooperativis tai teritoris dulà che a son minorancis linguistichis.

"Identità e cooperativismo in territori di insediamento di minoranze storico-linguistiche" - chest il non dal progjet - al à chê di verificâ se lis minorancis a puedin doprâ il spirt di cooperazion tant che risorse sedi economiche sedi culturâl, cjapant ispirazion di gnovis formis di imprese sociâl di sucès.

Austrie e Italie, di fat, no spartissin dome une frontiere tal arc alpin, ma ancje la presince di minorancis che a puedin doprâ il confin tant che oportunitât di inricjiment e disvilup.

Il progjet, inviât tal Otubar dal 2012 - tal an internazionâl des cooperativis - e che si concludarà tal Març 2015, si davuelç tes provinciis di Belum, Bolzan, Udin e Gurize par chel che al rivuarde la Italie e tai distrets di Villach, Klagenfurt e Völkermarkt pal chel che al inten la Austrie: al è un teritori dulà che a vivin plui o mancun 800 mil personis di minorance furlane, slovene, ladine, ven a stâi il 50 par cent suntune popolazion totâl di 1,5 milions. In particolâr, te aree cjapade in considerazion dal ID-Coop, a son 80 mil i ladins, 700 mil i furlans, 79 mil i slovens.

Il cjâf di grup EURAC al lavore dutun cun cuatri ents principâi doi a rapresentin il Friûl Vignesie Julie, ven a stâi ARLeF e il Comun di Monfalcon, e i altris doi a son la SGZ, Union economiche slovene de Carinzie e la Provincie di Belum.

E je la prime volte che ARLeF e partecipe a un progjet european di cheste complessitât. La Agenzie, daspò jessi stade impegnade tes setemanis stadis a comunicâ al EURAC i dâts su teritori, politiche, strutture juridic istituzionâl e su aspjets socio linguistics dai Comuns de provincie di Udin cun presince des minorancis furlane e slovene, cumò e da une man al cjâf di grup te fase di racuelte des rispuestis dal cuistionari che al è stât mandât a 135 aministrazions comunâls.

"Al sarà une vore impuartant rivâ a otignî i dâts di bande dai Comuns - al spieghes il diretôr de ARLeF, William Cisilino - parcè che une volte elaborâts a permetaran di individuâ il teren plui bon par sperimentâ il 'model tipic' di cooperative. Al è par chest che o invidìn dutis lis aministrazions a rispuindi drenti dal tiermin dai 22 di Jugn: al sarà pal lôr teritori une pussibilitât par svilupâ imprese e par promovi occasions di lavôr".